



Muchanan di scol a participa na ceremonia di Bonbini pa Bishita Real



DEPARTAMENTO di Enseñansa Aruba ta gradici un y tur cu a haci esaki posibel. Dia 28 di october ultimo a tuma luga e Celebracion di Bonbini en conexion cu e bishita di Su Altesa Real Reina Beatrix acompaña pa Prins Willem Alexander y Prinses Maxima. Pa e ocasion aki e Comité Organizado Comision Bishita Real a organisa e Ceremonia di Bonbini oficial. Esaki a tuma luga dilanti di Parlamento y a conta cu e participacion di alumnonan di diferente scol rond di nos isla cu a bin pa duna Bonbini na e Bishita Real. Riba peticion di Comision Bishita Real, Departamento di Enseñansa Aruba a coordina e participacion di e muchanan di scol. E scolnan participante tawata: Mariaschool, Caiquetioschool, Pius X. School, St. Annaschool, Colegio F. B. Tromp, Kukwisaschool, Rosa College, Rosario College di Stichting Katholiek Onderwijs Aruba (SKOA), Scol Basico Reina Beatrix, Emmaschool, Scol Primario Kudawechea, Scol Basico Conrado Coronel, Scol Basico Commandeur Pieterboerschool, Scol Basico Hilario Angela, Scol Paso pa Futuro, Scol Basico Washington di Dienst Publieke Scholen (DPS), Mon Plaisir Basisschool en Kleuterschool, Graf von Zinzendorfschool di Stichting Protestants- Christelijk Onderwijs Aruba (SPCOA) y Scol Dun'un Man di Stichting voor Verstandelijk Gehandicapten Aruba (SVGA). Parti di e programa aki tawata e bunita presentacion di un Coro Nacional cu a consisti di alrededor 300 mucha di e diferente scolnan basico rond di nos isla. E preparacion y coordinacion general di e coro tawata den man di señora Maybelline Arends-Croes. E coro a wordo acompaña pa un orkestra hubenil di Scol di Musica Rufo Wever y tabata bou direccion di señor Johnny Croes. E coro a canta tres cantica pa famia Real: Trip den stad, Aruba stim'e y Un canto di Bonbini. Un canto di Bon Bini a wordo specialmente componi y aregla pa e Bishita Real. Comision Bishita Real a percursa pa varios tent disponibel pa e muchanan por a para den sombra y caminda e muchanan por a haya awa pa bebe y pan dushi pa come. Tambe nan a parti banderín di Aruba y Hulanda pa e muchanan. Arubus a haci un bon trabou di busca e muchanan na tempo pa transporta nan di y pa scol. Mester menciona tambe cu Inspectie van het Onderwijs a duna un bon cooperacion pa tur e scolnan por a bin presencia e Bishita Real.

Sin mas por bisa cu e muchanan tawata hopi entusiasmo y a gosa hopi di e ocasion aki. Nan a bay hopi contento y satisfecho bek scol. Departamento di Enseñansa Aruba kier gradici tur e cabañantenan di scol, maestro y maestra, directiva di scol y specialmente tur e alumnonan cu a contribui di un manera of otro pa haci e dia aki uno inolvidabel.